

四庫全書

史部

欽定四庫全書

世宗憲皇帝上諭內閣卷一百十

雍正九年九月

上諭七道

初三日奉

上諭訓練兵丁步行乃爲善技若勤習漸進一日可行至一百四五十里著交八旗都統副都統前鋒統領護軍統領等將各管官員兵丁內年五十以下者皆令演習

趨走務期服勞耐久朕與限一年俾各演習俟一年後
特指一處務令到彼以驗其能否若有步行不能到所
指之處者朕惟該大臣等是問如有步行超越者朕分
別賞賜

又奉

上諭據江南河道總督嵇曾筠奏七八月間湖水增長幸
堤埽工程業已搶築加高湖流循軌東注所有邳宿黃
運河湖一帶運道生民咸資利涉而登衽席等語年來

仰賴

河神福國佑民安瀾有慶朕心深爲感慰著照上年致祭典禮敬謹展祀以伸報享之誠嵇曾筠初任北河時尚覺拘謹後因歷練多年識見開展竭其心力與田文鏡和衷共事凡所辦理皆甚妥協自總理南河以來公正明達經理合宜不負朕倚任之重甚屬可嘉著交部議叙具奏

初五日奉

上諭寧夏橫城口及黃甫川邊外閒地與鄂爾多斯接壤內地民人越界耕種而蒙古等私索租價每至生事互爭經該部堂官奏請照例定界朕遂降旨交與該督撫確查定議今據該地方官派員與鄂爾多斯之札薩克等會勘請照原定之例分界經大學士議政大臣等議覆准行朕爲天下主薄海內外一視同仁若照廷議立界俾民人蒙古各守界址彼此無爭揆之事勢似屬有益著行文鄂爾多斯之札薩克王等再加詳悉詢問如

此立界於伊等有無裨益之處各抒意見公同商酌具奏到日再降諭旨

十四日奉

上諭前經署江西巡撫張坦麟條奏請將南昌府新建縣之吳城鎮改隸南康府星子縣管轄經部議准行在案今該撫謝旻奏稱據本地士民連名具呈均稱未便等語從前張坦麟冒昧陳奏妄事紛更甚屬不合常見督撫提鎮等於蒞任之初或輕聽人言或自憑臆見率爾

具奏更改舊章不計事之永遠可行與否及至再經條
奏仍復成規多費曲折地方官民未必不受更張之擾
累嗣後文武官員等倘有將地方不可施行之事妄行
條奏舉行經後人復請更改者將原奏之人交部議處
倘原奏本是而後人妄行指摘或有意翻案者經朕察
出亦必從重處分永著爲例

十六日奉

上諭設立朱局一事並非有人條奏原出朕之本意爲有

益兵丁起見迄今三年看來米價平穩實爲有益此旗
民所共知者經手官員理合議敘然使不問素日辦理
何如但以滋生利息多者議敘則將來必開營利之端
殊失朕之本意未爲妥協應查自設立米局以來大臣
官員未經更換並無辦理失宜曾經叅處事故者列入
優等議敘方爲得宜此議著察旗侍衛參領逐一查明
後令弘春石文焜鄂齊趙弘濟等再加詳查會同八旗
大臣公議具奏

十七日正黃旗滿洲都統鄂彌達等奏拖沙拉哈番
巴明告休奉

上諭巴明准其休致若賞給半俸將官職仍與伊子承襲
則俸祿便至重複若承襲與伊弟兄之子尚可賞給半
俸著八旗查明有似此者畫一為例

又奉

上諭上年西路擊賊有功及帶傷患病之兵丁前已降旨
令其各回內地營汛休息調理以示恩恤其凍傷手足

致成殘疾者舊例查其子弟一人入伍食糧仍令地方官每月給米三斗以養贍其終身今聞帶傷患病之兵丁回營調治已陸續痊愈據署固原提督范時捷奏稱本標患病回營兵丁二百五十八名內僅有十一人受傷稍重已成殘廢難以照常差操等語朕思本兵若成廢疾而家無可以入伍食糧之子弟恐月給官米三斗不敷其餬口之用實爲可憫著該管大臣確查上年西路兵丁因擊賊而傷損手足致成廢疾其家又無子弟

可以入伍者俱著給與守糧一分養贍以終其身用示
朕加恩優恤之至意

世宗憲皇帝上諭內閣卷一百十

欽定四庫全書

世宗憲皇帝上諭內閣卷一百十一

雍正九年十月

上諭十道

初三日奉

上諭九月二十九日皇后崩逝朕心震悼比時即欲親臨
含殮大臣等以朕躬初愈本日已經臨視不宜再勞懇
詞力阻朕勉從其請暫停前往今該部具奏祭奠禮儀

日期朕思

皇考昔年於

皇妣孝誠仁皇后

孝昭仁皇后之喪如何

親臨盡禮之處朕雖未見至於康熙二十八年

皇妣孝懿仁皇后崩逝當

梓宮未移之時

皇考朝夕臨奠及奉移之後每遇祭祀日期悉皆

親往此朕所親見者今皇后自垂髫之年奉

皇考思命作配朕躬結禱以來四十餘載孝順敬恭始終一
致忽焉長逝實深愴惻一應致祭典儀本欲親往以展
悲懷但自上年以來朕躬違和調理經年近始痊愈醫
家皆言尚宜靜攝不可過勞因思怡賢親王仙逝之後
朕悲情難遏曾親奠數次頗覺精力勉強是以自上秋
至今未曾再往朕躬受

皇考付託之重

宗社攸關爲億萬臣民之所倚賴今夙恙初痊正當加謹保護之時况目前軍務緊要一切機宜甚費籌畫若又親臨喪次不但往來奠醊之間外勞形體而觸景增悲更致內傷心氣實非攝養之所宜即朕自度力量亦覺勉強今皇后喪事國家典儀雖備而朕躬禮數未周於理恐有未協於情實爲難忍權衡輕重之間如何可使情理兼盡以慰朕心著大學士九卿等公同定議具奏

初四日

諭禮部皇后那拉氏作配朕躬經四十載奉事

皇祖妣孝惠章皇后

皇考聖祖仁皇帝

皇妣孝恭仁皇后克盡孝忱深蒙

慈愛服膺朕訓歷久而敬德彌純懋著坤儀正位而小心益
至居身節儉待下寬仁慈惠播於宮闈柔順發於誠悃
昔年藩邸內政聿修九載中宮德輝逾擢茲於雍正九
年九月二十九日崩逝惓惟壺職襄贊多年追念懿徽

良深痛悼宜加稱諡以永休光著內閣翰林院擬奏應
行典禮爾部詳察議奏

又奉

上諭訓練兵丁甚爲緊要著於教養兵閒散滿洲或養子
開檔人內增挑二千名不必論旗惟視其人材壯健可
用者挑取給與三兩五錢錢糧馬甲米石著弘昇與護
軍統領博第副都統倭星額專管訓練其應派管教之
員著弘昇博第倭星額會同各該都統等酌量派委其

盔甲器械著工部造給

又戶部議覆巡漕御史西爾璜等條奏六款均無庸
議奉

上諭西爾璜龔健颺身爲言官親在淮河地方稽查漕務
非風聞言事者可比自應將深知灼見實有裨益之事
條奏施行此本內所奏各條或係不可施行之事或係
已經定例之事而西爾璜等摭拾虛文以塞言責今經
部議一一指駁無一件可行者朕降旨詢問伊等惟自

認冒昧糊塗而已著將西爾璘龔健颺交部嚴察議奏
以爲妄言生事者戒

十六日奉

上諭朕聞今年各扎薩克旗分所種之穀皆已被旱稍長
又復經霜未曾收穫以致乏食無以度日今特遣侍衛
章京前往加恩賞賚蒙古人衆皆扎薩克等所屬部落
米穀未收不能度日自應預爲籌畫生計今朕加恩賞
給銀米該扎薩克及官員等若不實心辦理有侵蝕之

處日後朕必聞知伊等何顏見朕將此旨徧行傳諭扎薩克等

又奉

上諭八旗王公及閒散宗室等所有口外牧場看守牲畜之蒙古其有馬匹牲畜田產者尚可度日若並無馬匹牲畜田產伊等家主豈概能養贍或因不能度日以致妄生事端則伊等家主無辜受累矣與其任伊等游蕩莫若命大臣前往收養自八旗王公宗室並大臣官員

以至閒散人等著通行曉諭伊等所有口外蒙古內如有此等無馬匹牲畜田產不能照看養贍情願報出者令伊等家主各行報出

十七日奉

上諭年來因征勦準噶爾將滿漢兵丁陸續派出特令召募以實營伍凡膺募兵之任者自應秉公持正不徇情面精選技勇壯健之士則戎行可收實效而軍餉亦不至於虛糜朕聞召募新兵多屬本營兵丁之弟男子姪

親戚友朋互相援引而進該管將弁惟期充足數目不復較量人材以致老弱無能者俱得入選而民間強壯之人莫由食糧入伍是將選兵重大之務視爲具文矣現今降旨募選兵丁著該部通行曉諭令該管大臣官弁等屏除向來積弊公正辦理將來朕必遣官考驗若有將老弱無能之人冒濫入伍者必將挑選之員從重議處若技勇之人不敷挑選著聲明緣由請旨毋得苟且塞責

二十二日奉

上諭沿邊一帶地方最爲緊要向來額設之兵太少昨已降旨令古北口宣化大同三處召募兵丁添入防汛以實營伍今思獨石口以東至山海關皆屬內地各處營汛仍照舊規其獨石口以西至殺虎口一帶中間緊要隘口必須查勘明白以定添兵多寡之數至於邊牆年久倒塌而地當緊要者亦應酌量修築以肅邊境著御史舒喜天津總兵官補熙前往會同古北口提督路振

揚親往踏勘召募之兵何處應添若干何處應駐大員
或將參遊改爲副協邊城何處應行修理路振揚等可
會同各該提鎮詳悉定議具奏天津總兵官印務著冠
軍使孫承恩前往暫行署理路振揚現有召募兵丁之
事今既奉差公出其募兵之事著路振揚遴選公明可
信之人代為辦理再差副都統韓光基前往古北口督
率查驗

二十四日奉

上諭陝西興安州知州張勤寵被叅一案該撫議稱張勤寵除嗜酒貪佚無故稽留屬員各輕罪不議外其收受紗燈計價三兩六錢應擬杖七十等語張勤寵嗜酒貪佚無故稽留屬員此等舉動難以居官臨民議以斥革洵不爲枉若計贓論罪必有貪婪實蹟方可引律定擬今以紗燈微物所值不過數金卽論贓擬以杖責則苛細太甚大失平允之義封疆大臣察吏當執公正之法而定罪亦當體可恕之情張勤寵杖罪著寬免

二十五日奉

上諭浙江布政使張元懷前奏賈魯河不盡通流請動存
公銀兩疏濬一案朕降旨令總督田文鏡會同張元懷
查議具奏今據田文鏡張元懷會奏各處河道一律通
流並無阻滯偶因今歲七月間大雨疊沛扶溝等處山
水陡發河流湍急水湧出槽旋即消落並非河身不盡
通流之故應將前請疏濬之處毋庸議張元懷亦自認
才識疎淺實有未能見及冒昧具奏等語凡爲封疆大

臣者於地方興革事宜必須深知灼見而後可以奏請施行今張元懷自行具奏之事及朕降旨會同確勘伊又自認不可施行而以才識疎淺未能見及爲謝過之地張元懷係暫行署印之員明知督臣回任本身卸事在即而以不可施行之事急切陳奏此非無心之過可比著交部嚴察議處以爲懷私妄奏者之戒

世宗憲皇帝上諭內閣卷一百十一

欽定四庫全書

世宗憲皇帝上諭內閣卷一百十二

雍正九年十一月

上諭八道

初一日奉

上諭馬拉僧格等奏稱班臣額爾德尼貝勒頗羅鼐遣人
送給官兵奶油炒麵牛羊乾糧屢次退還堅不領回只
得接受均勻散給官兵等語爾等行文馬拉僧格將班

臣額爾德尼頗羅鼐所送之物富裕核算給發銀兩并傳諭伊等朕遣兵在藏駐劄特爲衆湯古忒防守地方使之寧靖豈有絲毫貽累之理今所送諸物勢必在屬下衆人攤派未免滋擾朕心實所不忍且我兵糧餉並不缺乏無須幫助朕是以傳諭賞給銀兩初非外視爾等也可明白曉諭衆湯古忒咸悉朕意

初六日辦理軍機大臣奉

上諭山東登州乃濱海重鎮所轄地方遼濶查該鎮本標

及所屬兵丁除水師外額兵六千餘名似不敷用再自
添設河東總河之後將南河總河標兵歸於河東總河
管轄而以漕標兵丁一千餘名改歸南河總河於是兩
河標兵及漕標操防之兵俱覺不敷此四處兵丁應否
酌量增添之處爾等詳查定議具奏

初七日奉

上諭朕聞各省漢軍駐防兵丁營伍俱屬廢弛而鎮江爲
尤甚前已降旨令將軍王鈇加意整理俟明春專派官

員前往考驗今值管理蘇州織造事務海保回南之便
因思蘇州與鎮江一水相通計程不過二百餘里就近
稽查最爲便捷著海保回蘇之後於今冬明春時常往
來京口將兵丁技勇營陣規模以及馬匹戰船甲冑鎗
礮器械之完備與否一一查驗會同王鈇勤加操練務
令水師陸路兵丁等技藝嫻熟武備整齊將來或有調
撥差遣之處接奉諭旨數日之內即可起程如此方爲
國家有用之勁旅俟明年二三月間朕再遣專官前往

察看

初八日大學士等將四川巡撫憲德叅奏鄰水縣知縣王鴻勳順慶府知府馬世端一案請

旨奉

上諭馬世端原係憲德題陞之員今因溺職被叅憲德自行檢舉數年以來凡遇督撫自行檢舉之案朕皆令大學士等兩擬票簽進呈是以憲德此案大學士等於照例擬票外亦添從寬免議一簽但朕詳閱此本王鴻勳

縱役殃民馬世煊徇情容隱乃司道揭報而憲德題叅者朕思司道既已揭報則憲德安能隱匿不叅與督撫自行查出糾叅者不同難援自行檢舉之例免其議處也憲德仍交部議嗣後有與此等相類者不必兩擬票簽並將此批示中外知之

十一日奉

上諭據浙江總督李衛奏稱嘉興府屬七縣並杭州府屬之海寧一縣於九月初旬正當禾苗秀實之時忽有細

蟲生於苗腹以致未穗黃萎通邑計之此有彼無此多彼少尚不至於成災但收穫之時未免少減分數而所收之米青白不一且有米粒細小者僅可食用難以完漕仰懇皇恩將嘉興等縣今歲應完漕米改爲折徵或照雍正元年四年恩旨每石折銀一兩或照雍正五年部定每石折銀一兩二錢之例出自聖恩等語朕思數年以來杭嘉湖三府百姓於額徵錢糧急公輸納無有逋欠甚屬可嘉今茲數處小有蟲災米粒稍碎不能完

漕應令減價折收以示體卹著照雍正元年四年之例
每石折銀一兩徵收解部

二十日奉

上諭八旗漢軍兵丁技藝俱未嫻熟皆由失於訓練所致
今於額數之外挑選丁壯二千名另設一營教習訓練
務期精銳再八旗漢軍勲舊大臣等子弟因其父兄失
於教導甚乏可用之才朕心深爲憐憫現今尚耿石李
佟祖蔡王諸家之子弟無論在京在外其年至十五歲

以上二十歲內外者著揀選帶領引見朕量其材器令其學習行走日後俾得成就以副朕加恩勲舊子弟之至意著於今冬辦理妥協俟明年開印之後奏聞請旨再八旗內有與尚耿石李佟祖蔡王諸家相似者一併查明添入

二十三日奉

上諭朕因各省駐防兵丁技勇多屬生疎營伍亦覺廢弛所養馬匹多不足額其中漢軍爲尤甚已於今年八月

間先行曉諭申飭俟明年春月各差科道等官前往查看儻仍不悛改嚴加議處朕思營伍廢弛兵丁怠惰之習若該管官弁等果能實心整頓訓練數月之內即可改除惟是馬匹不敷額數若責令一時購買足額或致馬價昂貴兵丁力量艱難況如南方諸省平時既難喂養而一時急切買補又較難於北方著該將軍等酌量稍爲變通現養幾匹其所少者存價於官一有調遣即可購買應用不致遲悞公事此朕格外體恤之特恩若

再奉行不力一經查出弁兵等俱不寬貸

二十八日禮部議覆琉球國中山王尚敬奏請進貢
方物遵依舊典二年一貢應如所請奉

上諭朕因琉球地處重洋之外奉表修貢遠涉風濤深爲
軫念曾經降旨將雍正八年貢物准作十年正貢今該
國王奏請按期入貢情詞懇切具見悃誠著仍遵前旨
若十年貢物已經遣使起程即准作十二年正貢十一
年不必遣使前來將此文該國王知之

世宗憲皇帝上諭內閣卷一百十二

欽定四庫全書

世宗憲皇帝上諭內閣卷一百十三

雍正九年十二月

上諭十一道

初四日奉

上諭據廣東布政使楊永斌奏稱鐵器一項所關綦重不許出境貨賣律有明條粵東出產鐵鍋凡洋船貨買歷來禁止乃夷船出口所買鐵鍋有自一百連至二三百

連甚至五百連一千連者查鐵鍋一連約重二十斤如一船帶至五百連千連即無慮一二萬斤計算每年出洋之鐵爲數甚多誠有關係嗣後請照廢鐵之例一體嚴禁違者該商船戶人等即照例治罪官役通同徇縱亦照徇縱廢鐵例議處凡遇洋船出口仍交與海關監督一體稽察至於商船每日煮食之鍋應照舊置用官役不得借端勒索滋擾如此則外洋之鐵不致日積日多於防姦杜弊之道似有裨益至煮食器具銅鍋砂鍋

俱屬可用非必盡需鐵鍋亦無不便外夷之處於朝廷柔懷遠人之德意原無違碍等語鐵觔不許出洋例有明禁而廣東夷船每年收買鐵鍋甚多則與禁鐵出洋之功令不符矣楊永斌所奏甚是嗣後稽察禁止及官員處分商人船戶治罪之處悉照所請行儻地方官弁視爲具文奉行不力經朕訪聞或別經發覺定行從重議處粵東既行查禁則他省洋船出口之處亦當一體遵行著該部通行曉諭永著爲例

初六日奉

上諭據雲貴廣西總督鄂爾泰奏古州苗疆勦撫全定都
江河道開通前後開拓五六千里黔屬地方較舊址式
廓數倍等語古州等處苗蠻自古未歸王化總督鄂爾
泰賢聲素著調度有方從前次第經理各寨就撫惟清
江餘孽反覆靡常都江一帶生苗尤爲頑悍難制該督
調兩省之兵竭二年之力悉心籌畫均合機宜俾河路
開通苗疆全定安邊寧民之績甚屬可嘉在事有功弁

兵除從前已經議叙賞賚外其後勦撫清江等處尚未
邀恩者著鄂爾泰查明分別等次具奏候旨一體加恩
十二日奉

上諭雍正三年以前虧空各案八旗及各部院繕寫清冊
具奏朕交與大學士等覆看請旨朕分別情罪輕重或
行寬免或仍行著追大學士等奉旨後仍將原冊交還
各該衙門而他處未曾存貯檔案恐日久弊生胥吏等
有巧爲改補增添之處不可不加防範著八旗及各部

院將已經奏過之冊籍悉行用印收貯本衙門再另造一本用印交送內閣收貯以備查對嗣後悉照此辦理

十五日奉

上諭據奉天府府尹楊超曾奏稱臣查奉天各屬從前一切公務類皆取給於里下總計一歲之科派多於正額之錢糧如遇奏銷丁地驛站大造編審人丁大計考察官吏等項自臣衙門家人書吏以至治中知府州縣衙門均有陋規銀兩名爲造冊使費歲科考試生童自府

丞治中知府州縣衙門俱有陋規銀兩名爲考費至大小官員到任則攤派修理衙署鋪設器用銀兩查點保甲換給門牌印捕等官則攤派紙張飯食銀兩以上諸項各州縣每項約攤派銀數十兩至百餘兩不等上司衙門既取給於州縣州縣復取給於百姓更有衙蠹里書從中指一派十侵收包攬弊竇多端臣訪聞之後即嚴飭各屬勒碑永禁并令嗣後如有上司衙門官吏索取前項陋規務使徹底澄清不許絲毫派累等語從來

地方科派陋規甚爲擾累該府尹楊超曾通行查禁辦理甚是但恐相沿已久官吏人等尚有陽奉陰違者又恐日久法弛將來接任之員或有仍襲從前之陋習者用是將楊超曾所奏宣示於外令奉天官吏人等永遠遵行以除積弊以惠閭閻

十六日奉

上諭逆賊呂留良以批評時藝託名講學海內士子尊崇其著述非一日矣今罪蹟昭彰普天共憤內外臣工咸

以罪犯私著之書急宜焚燬爲請朕以爲從來無悖逆之大儒以呂留良之姦邪即令學問淹貫文詞雅馴而身蹈悖逆之行口譚聖賢之言言行不符之小人其所著之書尚足令人尊信乎若因其人可誅而謂其書宜燬無論燬之未必能盡即燬之而絕無留遺天下後世更何所據以辨其道學之真僞乎以故燬書之議概未允行頃者翰林顧成天奏稱呂留良所刊四書講義語錄等書粗浮淺鄙毫無發明宜敕學臣曉諭多士勿惑

於邪說爰命在廷儒臣詳加檢閱茲據大學士朱軾等
於其講義語錄逐條摘駁纂輯成帙呈請刊刻徧頒學
宮朕以逆賊所犯者朝廷之大法也諸臣所駁者章句
之末學也朕惟秉至公以執法而於著書者之爲醇爲
疵與駁書者之或是或非悉聽之天下之公論後世之
公評朕皆置之不問也大學士朱軾等既請刊刻頒布
學宮俾遠近寡識之士子不至溺於邪說朕思此請亦
屬可行姑從之以俟天下後世之讀書者

又江西巡撫謝旻奏請原任學道高鑽崇祀名宦奉
上諭名宦鄉賢關係國家崇祀大典朕屢降諭旨令該督
撫等秉公詳慎以彰激勸該督撫自當仰體朕心不應
尚有瞻徇冒濫者江西學道高鑽昔年曾侍朕讀書其
在江西學政任內非一塵不染者此朕所深知今謝旻
題請崇祀名宦不知高鑽之視學江西果有教澤及人
士子實心感頌乎抑以其昔曾侍朕讀書故請列於名
宦之內而非出於輿論之公乎著行文該督撫將高鑽

應否崇祀名宦之處詢問江西通省紳士令其據實陳奏俟奏到之日再降諭旨以朕所知之高鉞如此則其他可知朕屢經教導而督撫等身受封疆之重寄於崇祀大典不能鑒別公當返之於心能無愧乎

二十日諸王大臣等恭進

聖祖仁皇帝實錄聖訓奉

上諭

皇考聖祖仁皇帝厚德豐功彌綸宇宙光天之下知識之倫

莫不霑被

聖化歌詠太平朕纘承統緒於

皇考一言一動時時奉爲法守爰命大學士等恭輯

實錄聖訓茲者纂修告成朕得朝夕誦述身體力行且俾萬

世子孫臣民欽遵弗替朕心慰悅與卿等同之

二十一日內閣奉

上諭欽惟我

皇考聖祖仁皇帝神聖首出臨御萬邦六十餘年至德豐功

際天蟠地自昔史冊所載罕有比倫雍正元年朕命大臣等督率官員敬謹纂修

實錄昭垂萬世迄今九載編輯成書朕心嘉慰應加恩議叙以獎勤勞監修總裁官副總裁官及纂修提調收掌翻譯謄錄等員與執事人等作何議敘之處著該部查康熙十一年之例斟酌妥議具奏其筵宴賞賚亦著該部察例具奏

又奉

上諭

福陵紅門前大路與

寶城甚近車馬俱由山根左畔行走有關風水著行文奉天將軍府尹嗣後於渾河東南西南無關風水之處設立船隻以渡行人

紅門前大路及山根左畔嚴行禁止行走再渾河以北凡係風水之地所有草木不許擅動至遷移房屋禁止耕種地畝著賞給房價補還地畝

二十四日奉

卷一百十三

上諭江寧織造綏赫德已因年老革退聞織造衙門大有虧空皆係司庫筆帖式等支用見綏赫德離任分文不吐綏赫德代賠銀一萬餘兩及許夢閣到任交代又查出缺少銀一萬餘兩亦係筆帖式並匠役等虧空現在退出無多綏赫德復認賠補尚在未清綏赫德身爲織造一味罷軟糊塗致官役任意虧空賠補固所應當但司庫筆帖式敢於玩忽公事從前織造任內即侵帑分

肥至今積玩不改混行支用及至事發總恃有人代賠
置身事外此種惡習斷不可長況織造有兼管之關稅
似此弊蠹叢生勢必有虧缺稅課之事著許夢閣會同
署總督尹繼善將各項一一秉公查明嚴追清結具奏
江寧織造司庫如此其他織造衙門若有似此虧缺情
弊著該織造速行稽查彌補勿爲小人朦蔽倘仍復怠
玩瞻徇將來發覺定行從重治罪

二十六日奉

上諭今年西鳳二府併同華等州屬輓運甘涼西肅等處
兵米十五萬石各運戶因馱載牛隻疲乏在甘借領庫
銀一萬八千餘兩另僱牲畜轉運此項銀兩應於運戶
原籍即行催追還項朕恐伊等運戶中不無力量艱難
者已經降旨寬以一年之限今據署西安巡撫馬爾泰
布政使碩色等奏稱藩司衙門有連年平餘銀兩請克
公用等語朕思運戶借領官銀雖係應還之項然伊等
領運兵米如期運到並無遲誤應加格外之恩以昭獎

賞藩司衙門既有平餘銀兩著照數抵還運戶借領之
項免其催追以示朕體恤秦民之至意



世宗憲皇帝上諭內閣卷一百十三

欽定四庫全書

史部

世宗憲皇帝上諭內閣卷一百十四至

一百十八

詳校官左都御史李綬

編修臣裴謙覆勛

總校官原任中允臣王燕緒

校對官原任典簿臣郭祚熾

謄錄監生臣陳際龍

欽定四庫全書

世宗憲皇帝上諭內閣卷一百十四

雍正十年正月

上諭五道

初九日奉

諭八旗操演兵丁自古聖賢有云兵可百年不用不可一日不備是以帝王之治天下未有不以明武備為先務者而兵丁之演習武藝亦未有不勤加訓練而能有成

者從來士農工商各治一業不專心竭力業必不精兵
丁則所司者皆戰鬪之事彎弓挾矢冒鏑衝鋒非膂力
剛強不能披堅執銳非技藝嫻熟不能克敵宣威奈何
怠情苟安虛度歲月不思國家設兵之本意不念自己
專司之職業乎况爾兵丁世受國恩朝廷愛養猶如赤
子凡八旗將軍大臣等多由行伍出身漸登榮顯爾等
誠能立志向上奮勉自勵勤加練習俾技勇可觀將來
建立功勳馳名行伍不但本身有上進之階且光耀宗

祖榮及子孫受福曷可限量哉國家承平日久人人耽
於安逸武備漸覺廢弛今當邊陲用兵之際是以降旨
令勤操演又念操演之兵若仍輪流值班則其力難以
兼顧工夫未免閒斷是以不令該班俾得專心訓練又
復給以飯錢資其食用無非體恤爾等之勤勞也爾等
各宜勉力學習如騎射長槍之類必令純熟精強成國
家之勁旅以柔弱怯懦為恥以安逸華麗為戒為男子
者其榮耀在於材技之超羣而不在衣飾之鮮美也大

凡人之力量用之則日增不用則日減如出城操練之際正可演習步行何必騎馬乘車徒多糜費若此等者一經查出必從重治罪天地之間惟人最貴凡人但能自強何事不可成就切勿存自暴自棄之心嗣後爾等果能仰遵朕訓努力向前且互相勸勉鼓勵銳氣朕自必聞知加以格外之恩賞如有不肖之徒苟且怠玩甚至妄生怨言搖惑衆聽此等之人不但藐視公事自誤功名實為人心風俗之害經朕察出必以軍法從事勉

之勉之

又

諭八旗該班兵丁目今軍興之際兵丁等訓練操演甚為緊要若以操演之兵仍令照舊該班至換班之暇始行操演則訓練未有專功技藝難以純熟是以特加挑選令其每日操演將爾等分作兩班輪流當差所以使操演之兵得專心學習也然人果有上進之志何時不可黽勉何地不可學習即如爾等換班之時原可練習技

藝雖該班之地不便演放鎗礮而拉弓相撲舞棍趨走等技藝在領班之大臣官員未嘗不可訓練爾等慎勿以未經入選不在操演之列自甘懦弱而不勤加訓練也夫該班與操演俱係一體出力且操演兵丁如有缺少自必於該班兵丁內挑補則爾等不更當奮勉乎現今雖將爾等分為兩班較前稍為勞苦然較之軍前之人則勞苦又相懸絕矣如此行走不過數年仰邀

天眷大兵凱旋之時爾等差使仍得暇豫從容儻目今不思

黽勉但偷一時之安以致技藝生疎則日後必為無用之廢人試思士農工商各治一業未有不勤而能有成者況於爾等介胄之士尤以奮往學習効力為本業豈宜自甘於暴棄乎國家經制錢糧斷無養贍廢人之理如有此等無知不肖之徒一經查出除革退錢糧外仍從重治罪

十七日奉

上諭京師自上冬以及新春未得雨雪畿輔地方及近京

各省雖有奏報得雪者看來亦未普遍霑足因思上年十一月十五日月食據欽天監觀候曾引占書燕趙早禾麥有傷之語陳奏朕前朕心甚為憂懼擬於正月祈穀之期虔禱

上帝以迓

天和乃朕躬偶感風寒醫家奏請避風靜攝是以未曾躬親祀典此心愈加乾惕維茲數月以來雨雪未降顯係

上天垂象以示儆甚可畏也朕虔誠修省體察政治之闕失

以期仰格

天心爾大學士九卿等各宜恪慎齋戒至誠祈禱尤當洗心滌慮殫職奉公以為敬

天祈福之本京師為四方輻輳之地民食浩繁更宜預為籌畫至於該督撫等各自敬謹修省外所屬地方雨澤之有無播種之遲早務期悉心訪察先事圖維倘二麥歉收必有思患預防之策不使黎民有乏食之虞方不負朕之委任倘有玩忽隱飾等弊經朕訪聞必加嚴謹內

外大臣等領此諭旨務在實心奉行不必以空言覆奏
二十一日奉

上諭寧夏為甘省要地渠工乃水利攸關萬姓資生之策
莫先於此是以朕特遣大臣督率官員等開濬惠農昌
潤二渠又命修理大清漢唐三渠以溥萬民之利年來
惠昌二渠及唐渠工程漸次告竣於民田大有裨益其
大清渠漢渠雖未竣工然間連年加謹堵壘極力挑濬已
足以資灌溉不過湃岸閘座有應行修補之處可以從

容經理非比唐渠之必應及時速成也目今甘省軍興之際輓運兵糧正需車輛若因修理渠工有欵差官員在彼催趲工程又復僱車運送物料恐小民承應一切力難兼顧有誤春耕所當酌量變通以體恤民隱者查寧夏有專司水利之同知著將未竣之渠工交與該員照通智史在甲等所料估之處於每歲春工內分年陸續修理再令寧夏道鄂昌勤加督率不時稽查務期工程堅固利濟有資使民田永霑膏澤通智史在甲將各

件與鄂昌交代清楚即行回京其在工効力之文武官
弁交與該署督查郎阿計其在工之久暫察其奉職之
勤情量其辦事之能否應留陝題補委用者留陝題補
委用應咨部請旨者咨部請旨應發回本地者發回本
地其現任武弁及兵丁等派撥渠工効力者俱令各歸
營汛在工夫役等交與鄂昌將附近者令歸南畝遠來
者酌量遣回

二十七日奉

諭禮部孝敬皇后冊諡禮成爾部奏請命使敕諭朝鮮國
王朕思上年十一月已訃告該國王今因冊諡禮成又
遣官前往恐外藩不無迎送供應之煩此次不必命使
爾部照頒示各省之例一體行文朝鮮將朕此旨傳諭
該國王知之

世宗憲皇帝上諭內閣卷一百十四

欽定四庫全書

世宗憲皇帝上諭內閣卷一百十五

雍正十年二月

上諭十三道

初二日奉

上諭我朝撫有方夏

列聖相承惟以愛養黎元為本

聖祖仁皇帝臨御六十餘年恩施累洽於九州蠲賑動逾乎

千萬深仁厚澤浹髓淪肌謳思弗輟朕登大寶仰體

皇考仁愛之

聖心勤恤閭閻疾苦之民隱宵旰孜孜凡所以厚民生布膏澤者至周至渥歷年以來蠲免賑恤之條疊沛頻施海內亦既共知而共見矣惟是任土作貢者治世之常經勸善懲惡者馭民之大法禹貢以三壤成賦周官以九式經邦國家經費皆取給於正供聖人恤民之心無窮而取民有制亦不得分外姑息以絀國用也至於游民

情農王政所禁姦胥墨吏國法不容使蠲租免賦而姦
黠頑惰之屬皆得濫沐恩膏良善急公者轉未能均霑
惠澤又豈為政之道哉朕以為蠲除歷年之逋賦而使
頑戶偏蒙其澤不若減免新歲之額徵而使衆民普受
其惠從前曉諭中外者屢矣是以數年來朕查帶徵錢
糧如直隸河南山東山西浙江等省民間完納者最多
朕皆特沛殊恩於該省豐稔之年將額徵正賦蠲免四
十萬兩無非欲將帶徵完納之數仍散於良善之氓使

比戶均被恩施並未收之府庫此亦天下所共知共見者江南蘇松等處財賦甲於天下而歷年積欠亦較他省為最多朕既豁免康熙五十年以前之未完其五十年以後應徵之項復寬限十年十五年帶徵以紓民力又思此等逋賦實在民欠者固多而官吏侵蝕者正復不少特遣大臣官員等會同撫藩及地方有司逐一徹底清查分晰官侵吏蝕民欠三項以除朦混之弊又恐承命之員以徵納為清釐致滋紛擾悉將帶徵各項

停其輸納又時時嚴諭各員實力奉行務使分晰清明毫無疑竇今據侍郎彭維新巡撫尹繼善等奏報清查告竣自康熙五十一年起至雍正四年通計各屬積欠共一千一十一萬六千三百二十五兩零其中侵蝕包攬者共四百七十二萬六千三百一十兩實在民欠者共五百三十九萬一十四兩俱核對明白無有混淆等語朕因江蘇逋賦積弊叢生籌畫多年而為此清查之舉所以經國計清吏治實欲厚民生而除民累也苟有

益於羣黎百姓朕即樂沛浩蕩之恩况朕敬承

皇考

寬賦恤民之鴻慈於蘇松額徵浮糧豁免四十五萬兩

積歲計之其數何啻幾千百萬豈於區區積逋有所靳
惜哉但念官役之侵蝕姦徒之包攬蠹國害民固為法
所不宥而民欠累累亦皆抗玩疲頑之習日積月累以
至於斯也今若槩行豁免不惟墨吏姦胥罔知懲戒且
積久欠糧之頑戶無不沾恩被澤自以為得計而急公
之善良不與焉殊非阜民善俗之道也則與其蠲除歷

年之逋負孰若減免新歲之額徵為大有益於斯民乎
朕再四斟酌欲將侵蝕包攬之項分作十年帶徵實在
民欠之項更加寬緩分作二十年帶徵嗣後從壬子年
為始本年帶徵之項完納若干朕即照所完之數蠲免
次年額徵之糧若干若官吏百姓等果知悔過急公於
每年帶徵額數外多完若干朕亦即將次年錢糧照多
完之數豁免如此則朕之清釐積欠並無絲毫入官實
皆沛為萬民普被之澤而貪墨女姦蠹之徒無所徼倖抗

頑疲玩之習知所警惕庶幾吏治肅清而民風淳厚共成比戶可封之俗矣著該部行文該督撫令地方官實心奉行其官吏侵蝕之項務於本人名下著追毋得株連以滋擾累其民欠之項俱按各戶花名完納毋得波及兄弟親戚致令蠹役借端苛索儻有奉行不善生事擾民者該督撫即行題叅嚴加議處總期催科有法舊欠能依限清完新賦即得照數減免以副朕子惠元元稠疊加恩之至意朕意如此是否可行著九卿悉心詳議

具奏其催徵各州縣之處分應照何項錢糧之例亦著斟酌定議具奏再者凡此侵蝕錢糧之官吏皆係應加重罪之人第以歷年既久人數繁多槩行執法朕心有所不忍是以施恩法外寬為分年帶徵若廢員中有能悔過自新不拘年限先行完納者應分別准其開復以示獎勵其依限完納者寬免其罪胥吏中有先期完納者亦應酌量加恩其依限完納者亦寬其罪若官吏逾限不完除按律治罪外仍將本人監禁追比著九卿將

此一併議奏

又奉

上諭據雲南巡撫張允隨奏稱昭通鎮標汛防千總查出寧古塔逃回人犯憂虐磨奈阿木業者嫩蔑所三名已歷八月尚未准有部文到滇等語此等充發人犯原係兇惡之徒因不便仍留內地故爾投畀遐方乃發遣之後不知悛改復敢潛逃生事而該管官員又不即時行文捕緝往往至於兔脫國法安在著該部行文寧古塔

等處各衙門嗣後務將遣發人犯嚴加管束不時稽查倘有私自逃匿者立即報部通行查拏不得稽遲時日倘該管地方及該部行文稽遲查出定行議處

初三日奉

上諭我朝從前文武大臣持躬正直奉職公忠樹績建勲完名全節者朕已降旨於京師建立賢良祠永遠展祀以彰令範因思外任大臣鎮撫封疆宣猷布化忠勇效命威愛宜民其政績卓然可紀者若於身故之後建立

賢良祠俾得永膺祀典既足慰兵民懿好之公亦足為後來居官者之勸如近日之將軍蔡良提督張起雲總兵蘇大有魏肅國皆素有賢聲勤勞王事而歿於官者永宜在賢良之列著直省各於省會之地建立祠宇其與祀之人若追溯從前恐稽查未確或致濫膺不若即從近年為始向後若有應請入祠者該地方督撫於一人各具一本請旨不必彙奏其一切事宜著九卿妥議具奏

初六日奉

上諭察哈爾地方總管副總管辦事官員之缺因本處無
應補授之人始於京城蒙古旗分官員內揀選補授伊
等俱係由護軍披甲出身之人口外遊牧之地並無產
業艱於為生故常向所屬人等索取些微財物妄行侵
刻以致被人控告及被監察官員糾叅若將伊等即照
貪婪例治罪稍有可原嗣後察哈爾地方總管副總管
辦事官員由京城補授遣往者作何施恩賞給伊等產

業牲畜之處著大學士鄂爾泰等議奏

初八日奉

上諭自冬春以來京師未得雨雪朕與諸大臣等戒懼修省虔誠祈禱以冀仰格

天心聞畿輔地方及河南山東雨雪亦少山西陝西二省雖有得雪之處亦未周遍朕心憂慮深恐二麥歉收小民艱於餬口已切諭該督撫等多方籌畫為思患預防之計從來天人感召之理捷如影響所賴該督撫等以恤

民之心為格

天之本果能使民困全除民氣舒暢自無有不感名

天和者至於清理刑獄亦祈求雨澤之要務除在京已命刑部法司清查案件速行歸結以免拖累外其畿輔地方及河東山陝等省郡縣繁多有司賢否不一其中或有聽斷刻覈濫及無辜者或有淹滯羈留塵案莫結者或有牽連待質致誤恒業者該督撫大吏等當悉心體察嚴飭屬員速為清理應釋放者釋放應取保者取保務

期平允矜慎俾閭閻各安生業其他政令凡有稍不便於民者急思力為改圖總在該督撫等體朕若保赤子之心各切痼瘼乃身之念至誠惻怛勤求民隱殫竭實心普行實政庶幾

上天昭格早降甘霖勉之勉之

初十日大學士鄂爾泰奏辭開闢苗疆議叙奉

上諭覽奏情詞懇切具見誠悃卿忠勇懋著使苗梗向風不但綏靖苗疆之功績為人所難能而仔肩重任之公

誠亦大臣中所罕有國家酬庸賞功關係鉅典非卿可
以已意遜讓亦非朕可以私心增減者著仍遵前旨行

十一日

諭理藩院據上都達布遜諾爾馬羣總管五十四奏請遷
移駝馬牧廠以蘇尼特之南諾渾努魯西南之布倫呼
查西邊之薩木布喇克西北之塞爾北邊之桑圖東邊之
郭爾拜爾爲界地方寬敞便於牧放倘蒙古等遊牧之
處窄狹令其往外開展等語五十四此奏甚屬悖謬蒙

古扎薩克等受國家深恩養育多年人口繁盛牲畜孳生
日多方以伊等遊牧地方窄狹時厯朕懷豈有將內地
馬羣移於扎薩克遊牧之處轉令伊等往外遷移之理
乎上年令將馬廠移於上都達布遜諾爾時因值寒冬
是以暫令於巴顏托羅海地方擇好水草處過冬今青
草已生此馬羣仍著移於上都達布遜諾爾並非令在
伊等遊牧地方住牧也恐此際伊等屬下人等不知混
行那移著仍照各遊牧地方居住將此行文與蘇尼特

王等知之

又奉

上諭大學士鄂爾泰節制雲貴廣西三省歷有歲年於所屬苗疆無不悉心經理使蠻夷等慕義向風咸登樂土至於古州等處生苗自昔未歸王化鄂爾泰運籌調度勦撫兼施俾苗人懷德畏威抒誠內嚮疆圉開拓邊境輯寧數年以來之功績實非尋常平定苗疆剪除寇賊者可比鄂爾泰著授以一等伯爵世襲罔替用獎殊勲

十二日奉

上諭國家典禮首重祭祀每當齋戒日期必檢束身心竭誠致敬不稍放逸始可以嚴昭事而格神明朕遇齋戒之日至誠至敬不但殿廷供設銅人即坐卧之次亦書齋戒牌存心警惕須臾弗忘至內外大小官員雖設齋牌於官署但恐言動起居之際稍有褻慢即非致齋嚴肅之義查明代祀典凡陪祀及執事之人有懸祀牌之例今酌定齋牌之式令陪祀人員佩著心胸之間使觸

目警心并得彼此觀瞻益加省惕其於明禋大典愈昭
虔潔著傳諭各部院及八旗並直省文武官員一體遵
行

十六日奉

上諭據巡察御史黃祐奏稱失察賭具之地方官若該員
曾有拏獲賭具之議叙應准抵失察之處分等語此奏
似亦功過相抵之道而不知其中有必不可行者假如
該員到任曾有拏獲賭具數次議叙之案則後此之失

察皆可抵銷必至懈怠無所顧忌而禁約日流於廢弛矣譬如州縣盜案以其從前獲盜之功免其後來失盜之罪可乎惟是平日實心禁賭之員拏獲詳報甚多者偶有一案遺漏即與漫無覺察之員一例革職情有可憫著該部將此酌議定例具奏

十七日差往喀喇沁等處侍衛七十五等奏覆賑濟蒙古銀米事宜奉

上諭扎薩克旗分地方各處耕種所收米石存倉原為伊

等地方荒歲之用今此項米石盡行散賑伊等屬下蒙古倉廩空虛不可不預為之備著於賑濟米石外再行施恩每石給發價銀一兩交與各該扎薩克等買米存倉收貯俟入倉之日報部部內差員查驗若將賞給銀兩買補之米不行入倉及有侵蝕等弊必從重治罪

十九日奉

上諭朕聞西寧北川口外白塔地方出產石煤係附近漢土番回民人挖取販賣以為生計每馱納稅錢三十文

西寧府委員收解充餉約計每年收銀一千九百餘兩
近因西陲用兵之際西寧移駐兵弁較前為多率皆用
煤以供炊爨價值漸昂若仍照例徵收稅銀恐價值不
能平減於兵民均有未便著將應收稅錢寬免該督撫
轉飭有司實心稽查倘胥吏人等有照舊私收或借端
需索者務令察出從重治罪

又

諭刑部凡監候待質人犯除強盜案件不應寬釋外如人

命等案內有正犯未獲將牽連餘犯監候待質已過三年者著取具的保釋放在外俟緝獲正犯之日再行質審倘暫行釋放之際有私自逃匿者除保人重懲外定將本犯嚴拏從重治罪著直省一體遵行

世宗憲皇帝上諭內閣卷一百十五

欽定四庫全書

世宗憲皇帝上諭內閣卷一百十六

雍正十年三月

上諭十道

初二日奉

上諭據差往北路軍營之侍衛特庫等回來奏稱聞得兵丁等云鉛子與鎗口有不相合者若將鉛子之模頒給用鎗之人令鉛子俱與鎗口相合則鉛子出去有力而

且甚準又見兵丁等之箭有箭籥受鈇處及箭扣處未用筋纏者且有箭鈇短小未用膘入籥內者若製造兵丁等之箭將箭籥受鈇處及箭扣處俱用筋纏將箭鈇造長用膘入於籥內則益為堅利等語著各該處將現今運送軍營器械悉令如式製造堅固送往外在京八旗兵丁等所用之箭市買現成者居多不利於用著傳諭衆人務將箭鈇造長將箭籥受鈇處及箭扣處俱用筋纏嗣後點驗軍器時即照此點驗至於鉛子之模各

照所用鎗口製造如鉛子有與鎗口不合者另鑄備用
初三日奉

上諭向因落第武舉其中不無才力可用之人是以令本省督撫提鎮秉公考驗將年力精壯弓馬可觀者留營給與馬糧一分令其差操學習俾得熟練營務以備將來將弁之用隨經部文令給與額外馬糧各省遵行在案朕思此等武舉留營學習者原令該管大臣慎重遴選使人材有所造就也今聞外省中有視為泛常而庸

劣無能之人頗有濫充者著該部通行各省將技勇可用之武舉令其充補經制馬糧其不願留營及騎射生疎才力不及者令其回籍自行學習不得留營虛佔額糧之數倘該管大員有徇情草率仍令庸劣得以濫充者將來考驗察出定行從重議處

初八日奉

上諭直隸各府州縣設立壇壝致祭

社稷及

風雲雷雨山川城隍之神每歲春秋展祀以崇報享典至重也從前初建之時有司或視為具文規制未必周備及歷年既久漸有傾圮之處又未必及時修葺是以僻遠之郡縣規模簡畧禮儀草率者往往有之甚非肅將禋祀之本意也著禮部查照定例行文各該督撫轉飭府州縣敬謹如式修理以重祀典仍令造冊報部每遇該管官員陞遷事故俱照

先農壇忠孝節義祠例入交盤項內查明接受有司自顧

考成經理自益加虔恪矣

初十日奉

上諭湖南鎮筭鎮地接苗疆原轄四營額設兵丁三千名以資彈壓嗣因議分四路塘汛直抵六里新營該撫臣以六里新經招撫地方緊要奏請添設兵丁四百名經部議行今聞六里開闢之地所設永綏協營幅幘五百餘里以形勢而論尚在鎮筭之外止安設兵丁一千六百名至鎮筭所管苗疆界址亦僅五百餘里現有額兵

三千名較之永綏兵制數已加倍且永順保靖等處已建設營汛與鎮算益成犄角是鎮算額設之兵儘足以供守衛而資調遣新增兵丁甚屬無益著該督撫提鎮等確查地方形勢有要緊營汛應添兵丁之處即將鎮算新設之四百名酌量派撥以資防禦不必固執前見務於地方營伍實有裨益以為經制久遠之計

十七日戶部議覆山東巡撫岳濬查奏欠糧紳衿應照例斥革勒限一年全完開復奉

上諭部議甚是但東省前歲被水上年雨澤又復愆期州縣間有歛收之處紳衿逋欠未完與平時抗玩者有間著暫免斥革再寬限三年令其完納若逾三年之限仍復拖欠不完即著斥革此朕格外之恩後不為例

二十一日奉

上諭向因武員養廉不敷以致扣尅兵餉是以酌定親丁名糧以為養贍家口之費又因營伍公用無資定有額兵百名准抽二名之例似此曲加體恤無非施恩於弁

員使應有之兵數再無虛冒以收戎行之實用也近聞尚有數省不能全除空糧之弊或於親丁名糧之外仍有家人長隨頂名領餉者又有字識匠作之類亦得濫充額數暗佔兵糧者且或召募之時往往遊手之輩賄求濫充而勇力之人轉不能入選每遇調撥差用則委靡退縮不耐勞苦前歲湖廣提標曾以兵丁二百名調補鎮算四營其中逃避者即已過半又如上年為援勦黔苗一案提標兵丁往來鎮算六里等處跋前疐後行

役維艱此朕得之風聞者國家歲費帑金養一兵期獲一兵之用若實存之名數既有空虛而在伍之兵丁又復怯懦不振則所謂武備修明者安在乎著該管大臣用心稽查勤加訓練務將陋規永革諸弊悉除毋得溺於積習苟且因循負朕委用倘屢經訓飭之後仍有不知悛改者定當加以嚴譴

二十六日奉

上諭各省督撫因現在人員不敷委用題補奏請敕部揀

發朕始降旨令該部揀選人員引見命往以備委用即如上年直隸之揀發佐雜二十員乃從總督唐執玉之請也今署督劉於義又復奏稱直隸佐雜人多缺少補授無期請將各缺咨部借補等語直隸佐雜之缺既少則該督奏請揀發之時便當酌量以定人數何必任意多請以致壅滯於該省令該部停選以遷就之耶此前任督臣辦理錯誤處直隸州縣佐雜銓補之處仍照定例行若命往人多一時難於得缺著該署督酌量送回吏

金匱要略卷一百十六
部其才具好者該部入於他省揀選內引見請旨其中
平者仍歸原班銓選

二十七日奉

上諭各直省督撫提鎮標下之兵丁朕俱賞給生息銀兩
以濟其緩急之用而各省協營甚多一時難以普及意
欲俟軍務告竣國用充裕再思周遍加恩從前所頒諭
旨言之詳矣上年大學士鄂爾泰在雲貴廣西總督任
內奏請滇省舟楫不通所有生息銀兩分派營運則易

聚總生息則難若督撫提鎮各標賞銀過多轉致不能
營運漸生弊端臣是以將各鎮應領銀兩令與各協營
均勻分給俾得同受皇恩黔粵兩省亦彷彿照此辦理
等語此鄂爾泰因地制宜行之於邊遠三省使兵丁均
霑賞賚者今據廣東總督郝玉麟奏稱廣東督撫提鎮
各標蒙賞帑銀共十萬兩臣等經營籌畫計每年生息
除賞給督撫提鎮標兵外尚有餘剩銀兩應照各協營
寨兵數之多寡均勻分給於雍正癸丑年開賞以廣皇

仁等語朕愛養兵丁一視同仁本欲令其均霑恩澤但次第經理不得有先後之別今鄂爾泰郝玉麟通融辦理俾協營兵丁亦有以濟其緩急深慰朕加惠戎行之至意著各省督撫等酌量本地情形悉心籌運若可以照此變通辦理則協營兵丁可以早受恩賞誠屬有益但各省地方之利息輕重不同餘銀多寡不一非以不能行之省分令勉強從事倣而行之也

二十八日廣東巡撫鄂彌達奏高要縣縣丞陳中永

海豐縣石橋場大使王如珩均屬能員照例卓異奉
上諭鄂彌達等將歷俸未滿三年之陳中永等列為薦舉
懇請引見朕思凡人居官行事先後異轍者甚多即試
看三年然後薦舉尚不能保其不改初心今鄂彌達所
舉廣東各員既稱未滿三年自應再加試看何必急急
入於大計特薦之內此歷俸未滿各員俟下次計典舉
行時若居官果優著列為卓異請旨

三十日奉

上諭據署陝西巡撫馬爾泰等奏西鳳民人請辭賞賚衆口同聲輿情懇摯等語西鳳民人運米赴甘正米之外多交餘米急公敬事之念甚屬可嘉著仍遵前旨按名分別賞給其押運及收米官員著查郎阿馬爾泰等查明交部議叙

世宗憲皇帝上諭內閣卷一百十六

欽定四庫全書

世宗憲皇帝上諭內閣卷一百十七

雍正十年四月

上諭三道

初四日兵部等衙門議覆大學士鄂爾泰奏古州都
江上下各生苗陸續勦撫請添設協營官兵應如所
請奉

上諭朕與大學士鄂爾泰商酌新疆遼濶直通楚粵兼以

內地舊汛殊非古州一鎮所能統轄查都江清水江二江地界形勢兩路劃然牽合歸一終難控馭而古州鎮處都江之適中清江協處清水江之適中遙對雄峙各踞要區若於清江協裁去副將改設一鎮並於九股亦裁去叅將改設遊擊將新疆之丹江營台拱營與內地之銅仁鎮遠黃施天柱石阡平越等協營俱歸管轄其餘都勻協黎平營并新設之上江下江諸協營仍隸古州鎮管轄則弁兵原止如舊俸餉亦不須增添於數千

里苗疆可無鞭長不及之慮庶更屬妥協

二十二日刑部議覆安徽巡撫程元章奏亳州壽州私鑄兩案分別擬罪應如所請奉

上諭亳州壽州等處奸民私鑄錢文經朕訪聞確實於雍正七年秋間敕令步軍統領差役前往拿獲多人則其合夥私鑄為時已久事理顯然今該督撫等將各案查審具奏俱稱私鑄起於雍正七年之夏秋或鑄一月或鑄二三月即行停止朕體察情由顯有草率支飾等弊

私鑄大干法紀若督撫究問疎忽將來何以示懲至於
亳州案內挑水做飯得受工錢之栢雲唐章賣烟得錢
之李維三次買錢之李大回子俱以知情不報擬以立
絞似覺太重况壽州案內受賄不拿之捕役蘇標止於
擬絞監候則李維李大回子之罪不應在蘇標之上又
亳州案內有商同私鑄因無人掌爐而未經鑄成者亦
應酌量議減此數案內私鑄日期及錢文多寡之處著
該督撫再加確審務得實情不得草率結案其情罪稍

有可原之人分別治罪亦著另行定擬具奏

二十七日

諭理藩院察哈爾人等居住近邊歷年與內地之人一體
効力行走從前定制察哈爾處官員內有職任之員俸
祿給與四分之一伊等俱係國家効力舊人今特沛恩
膏有職任官員給與全俸無職任官員給與半俸

世宗憲皇帝上諭內閣卷一百十七

卷一百十七